



Seo cuid de na beathaichean 's na lusan a lorgadh tu anns a' choille. Tha pàirt aca uile ga ghabhail ann am beatha na coille.

Tha balgain-buachrach agus beacain (canaidh sinn fungas riutha cuideachd) a' fàs am measg nan duilleagan marbha anns an talamh no air fiodh a tha a' lobhadh. Le bhith a' briseadh sìos stuthan marbh, tha iad a' dèanamh todhar no hùmas airson an talamh a dhèanamh torach gus am fàs lusan ùra.

Ⓔ Nuair a tha na balgain-buachrach abaich crath an cinn os cionn duilleag pàipear; nì an sìol pàtran cruinn. Cuir fras glaodh gu faiceallach air a' phàtran sìl airson a ghrèidheadh gus an urrainn dhut a chur air a' bhalla.




'S e lobhadairean a chanas sinn ri fungas, cnuimhean, boiteagan agus cuid de dhaolagan.



Tha a' chuileag-ghlas, a' chuileag-gheal, cuileagan agus daolagan eile, burrais, corra-chòsagan, seilcheagan, seimhidh agus reudain ag ithe duilleagan nan lusan. 'S e lus-itheadairean beaga a th' orra.

*daolag - bhreac - dhearg*



*daolag*

*raodan*



Tha buidheagan ag ithe an t-sìl; tha coineanaich, luchainn agus famhalain ag ithe an fheadh, sìol agus cnothan agus 's e lus-itheadairean mòra a th' orra. 'S e lus-itheadairean nas motha buileach a th' ann am feidh.

Tha damhain-allaidh, fiolain-fada agus daolagan-breac-dearga ag ithe meanbh-fhrìdean beaga eile. 'S e feòil-itheadairean beaga a th' orra.

Tha cailleachagan agus ceileirichean ag ithe a h-uile seòrsa meanbh-fhrìdean 's tha smeòraich ag ithe boiteagan is seilcheagan. Tha speireagan ag ithe eòin bheaga agus tha clamhain ag ithe coineanaich, creimich bheaga agus feidh mharbh. 'S e feòil-itheadairean mòra a th' orra sin.